

# In svilup finanziel pauc legreivel

La suprastonza communal da Mustér sto repassar il preventiv 2015

DA HANS HUONDER / ANR

■ Il cussegl da vischnaunca da Mustér ha buc acceptau il preventiv pigl onn 2015. Il cash flow da rodund 460 000 francs ei per la legislativa communal memia bass. In sguard el plan da finanzas entochen 2020 muossa che la situaziun finanziaria dalla vischnaunca da Mustér ei tut auter che positiva. La suprastonza communal ha presentau al cussegl da vischnaunca in preventiv cun entradas ed expensas da rodund 13,8 milliuns francs ed in gudogn da struschamein 100 000 francs. Il cash flow previu igl onn 2015 importa sulettamein 460 000 francs. El plan da finanzas pils proxims onns sereducescha quel vinavon. Igl onn 2020 quenta la suprastonza communal cun in tal d'aunc sulettamein 19 000 francs. Il plan da finanzas ei buca vegnius tractaus dil cussegl da vischnaunca. Essend ch'el pretendia ina correctura tiel preventiv 2015 vegn quel medemamein a semidar pils onns suandonts. Perencunter ha il cussegl da vischnaunca priu enconuschientscha dil program d'activitad 2013-2016.

## Pusseivladads limitadas

«Nus havein l'incarica dil cussegl da vischnaunca da migliurar il preventiv pil quen da menaschi per rodund 500 000 francs. Quei ei pusseivel sulettamein sin fundament da mesiras efectivamein substanzialas. Nus plidein buca cheu d'in respargn da 500 francs per cuosts da porto ni telefon», di il president communal *Francestg Cajacob*. Il plan da termin



Il president communal Francestg Cajacob e ses collegas da suprastonza vegnan a stuer tscherchar ils proxims dis-pusseivladads per reducir las expensas dalla vischnaunca.

FOTO H. HUONDER

per il preventiv vesa ora suandontamein: «Nus vegnin a discutir quel proximamein en suprastonza communal. Alla proxima seduta dil cussegl da vischnaunca il december vegnin nus a confruntar quel cun ina retscha da mesiras pusseivlas da spargn ed il schaner duei el allura sefatschentar definitivamein dil preventiv pigl onn vegnent.» Tenor Francestg Cajacob ein las pusseivladads da respargn relativamein limitadas: «Ina gronda part dallas expensas ei dada sin fundament dil

dreteg surordinau ni en connex cun cunvegnyentschas e collaboraziuns intercommunalas. Consequentamein ei il spazi d'agir plitost pigns.» La discussiun occurrada il venderdis sera el cussegl da vischnaunca taxescha il president communal tonaton per constructiva: «Sin fundament da quella havein nus uss ina clara incarica ed era il cussegl communal vegn a stuer contribuir il siu vid quella mesiras. La fin finala giavisch el ina correctura relativamein considerabla.»

Francestg Cajacob conceda ch'in cash flow da 400 000 francs ei buca cuntenteivels.

## Repassar tuts secturs

Essend ch'ina gronda part dallas expensas ei dada resta allas autoritads communalas in spectrum restrenschiu per mesiras da spargn. «Il potenzial ei limitaus. Gest per quei motiv ha ei num repassar tuts secturs. Igl ei clar che las mesiras han consequenzas. Nus vegnin era a stuer

tschentar en damonda in survetsch ni l'auter», di il president communal. En quei connex constatescha el ch'ils preventivs dils davos onns ein adina stai plitost negativs ed ils quens la fin finala megliers. En connex cun l'evaluaziun da mesiras da spargn pusseivlas vegnan era structuradas a star en discussiun. «Nus vegnin segiramein era a stuer tschintschar dil scolaesser, la sparta cun las pli aultas expensas. Quei sectur vegn ultra da quei engreggiaus supplementarmein naven da 2016 dalla nova ulivaziun da finanzas», puntuescha il president communal. En discussiun en connex cun las mesiras da spargn stat denton era il sectur da persunal en general, mo era spartas sco il fo-restalesser ni il stradalessar.

## Avegnir malcuntenteivel

Il plan da finanzas pils onns 2016 e 2020 ch'ei buca vegnius tractaus dil cussegl da vischnaunca e che vegn uss a semidar sin fundament da novas mesiras da spargn preveda ina situaziun finanziaria pauc legreivla per la vischnaunca da Mustér. Tenor il sboz presentau dalla suprastonza communal sereducescha il cash flow vinavon ils proxims onns. Igl onn 2020 importa quel aunc rodund 19 000 francs. Consequentamein creschan ils dievets. Il mument muntan quels a bie-bein diesch milliuns francs. Entochen 2020 s'augmantan els sin 17,5 milliuns francs e quei senza far pli grondas investiziuns. En quella seconcentreschan las autoritads sin la migliuraziun e projects forestals ch'ei subvenziunai considerabla, respectivamein sin manteniment d'infrastructura existenta.

# Dapli informatica via ils roms facultativs

Il Center da formaziun Surselva ha definiu in'alternativa alla scola d'informatica

DAD ANDREAS CADONAU

■ Il Center da formaziun Surselva vul slargar la porschida d'informatica a partir dil proxim onn da scola malgrad la decisiun dil cussegl grond a disfavur dalla scola d'informatica. Ils roms facultativs dalla scola media seposchan sco alternativa. Ils responsabels dil Center da formaziun Surselva ein stai sfurzai da reponderar la strategia suenter il na dil cussegl grond alla scola d'informatica curdaus a caschun dalla sessiun d'october. Sco il center da formaziun scriva en ina comunicaziun ei la suprastonza dalla Regiun Surselva sedecidida da cuntinuar en in'otra direziun per integrar dapli informatica ella scola media. Enteifer ils roms facultativs dalla scola media porscha il center da formaziun a partir dil proxim

onn da scola sis lecziuns per jamna informatica. Quei principalmein ella sparta dallas applicaziuns. Sco motiv da promover la sparta dalla applicaziun informatica ha il meinagestiu dil Center da formaziun Surselva, *Curdin Tuor*, fatg valer igl interess dalla giuventetgna per quella scolaziun. «Nossa porschida actuala anfla gia ussa fetg buna accoglientscha.» E quei senza far gronda reclama, sco *Curdin Tuor* ha puntuau.

## Trumpai dalla decisiun dil cussegl grond

Il responsabel per il center da formaziun ha buca snegau dad esser staus trumpaus dalla decisiun dil cussegl grond da buca lubir l'introducciun dad ina scola d'informatica. Tonpli che la decisiun ei curdada fetg stretg e la proposta la fin finala

vegnida satrada cun il votum dil president dil cussegl grond. *Curdin Tuor* vesa denton era avantags ella porschida d'informatica supplementara via ils roms facultativs. El ha getg ch'ina scola d'informatica fussi ligada als plans detagliai da formaziun dalla confederaziun. «Enteifer ils roms facultativs havein nus maun liber da crear l'instrucziun tenor basegns.» Sulet cun nezegiar la porschida facultativa bandunan scolaras e scolaras la scola media buca cun in diplom arisguard la scolaziun d'informatica. Tuttina ei *Curdin Tuor* perschuadius che las perspectivas professionalas, principalmein per absolventas ed absolvents dalla scola media mercantila, semigliurien considerabla grazia alla scolaziun facultativa frequentada durant treis onns. Suenter in praticum sappien sco-

laras e scolaras denter auter cuntinuar cun in studi ad ina scola aulta specialisada per acquirar il diplom da programadra ni programader. Ils responsabels dil Center da formaziun Surselva ein buca stai promts da resignar suenter il na dil cussegl grond alla scola d'informatica. *Roman Cantieni*, cau dil departament da scolaziun dalla Regiun Surselva, ha menziunau la pretensiun viers las regiuns da scaffir porschidas attractivas per mantener la scolaziun decentrala. Ina incumbensa ch'el center da formaziun vegli adimplir cun ina scolaziun d'informatica supplementara adattada als basegns da scolaras e scolaras e dalla economia.

## Memia poucas plazzas d'emprendissadi

*Roman Cantieni* ha vinavon menziunau la munconza da plazzas d'emprendissadi d'informatica el cantun Grischun. Tenor sias explicaziuns mauncan denton plirs mellis dad informaticers egl avegnir alla economia. Ils basegns dad interpresas ed instituziuns da midar process da lavur manuals en process digital ei vinavon gronds e cuntinua. Slargar la scolaziun d'informatica ella scola media a Glion va denton era a favur dalla instituziun da formaziun. Ella drova dapli scolaras e scolaras per puder mantener la scola media. La nova porschida d'informatica sedrezza buca sulet a scolaras e scolaras dalla scola media. Personas interessadas alla applicaziun informatica san medemamein far par dalla scolaziun offerida enteifer ils roms facultativs. Per quei intent vegnan las lecziuns concentradas. Ils basegns per augmentar l'enconuschientscha informatica creschan ella populaziun. Gia tgirar l'atgna pagina dad internet drova certas enconuschientschas pli fundadas.

## Schoccads e surprais

■ (rtr) L'Uniun dals maisters mazlers grischuna è schoccada da l'affera enturn la mazlaria Carna Grischa a Landquart. Tenor il president dals maisters mazlers, *Felix Venzin*, n'han las mazlarias pitschnas betg da temair per lur renum. Il president da l'associaziun na tema betg per la reputaziun da las mazlarias pitschnas e mesauanas. Ultra da quai hajan las mazlarias pitschnas in contact pli direct ed immediat cun ils clients, uschia che questas na possian sa prestar damain sbagls che mazlarias grondas. Uschia vegnia quai lavurà pli conscienzius tar mazlarias pitschnas e mesauanas. Plinavant saja la concorrenza dal pretsch vers las mazlarias grondas uschè ferma che las mazlarias pitschnas e mesauanas gajan la strategia da la qualitat enstagl da la quantitat. Betg da chapir è per *Venzin* ch'els clients sez n'hajan betg percurschi insatge. Quels sajan en sasez er experts sco cuschiniers ed ustiers.

reclama

**Absurd und schädlich.**

**Die extreme Ecopop-Initiative schießt weit übers Ziel hinaus. So starre Quoten legen die Schweiz lahm.**

**ECOPOP NEIN!**

[www.ecopopnein.ch](http://www.ecopopnein.ch)



La giuventetgna drova buca sulet applicaziuns, ella vul emprender da crear novas. Il Center da formaziun Surselva porscha la scolaziun necessaria. MAD